

Ingoa: _____ Rangi: ____/____/____

Tātarakihi

Nā Te Aorere Riddell

Whatukura

Kia ora. Ko tōku ingoa ko Māhaki. Ko tōku tino hoa ko Kēmara. I waho atu i tōku kāinga ko tētahi rākau pōhutukawa e tipu ana. I tētahi rā i kite atu māua i tētahi kōhiwi. Kātahi ka karanga atu ki a Pāpā māna māua e whakamārama i te āhua o te ngangara nei.

“Ko tēnei te kōhiwi o te tātarakihi. Ko te kōhiwi o te tātarakihi nei he tipu kē i waho o ō rātou tinana. He rerekē ki ō tātou. He rerekē ki tō ngā kararehe, ngā manu, me ngā ika, nō te mea ko ō tātou kōhiwi kei roto i ō tātou tinana.” “Engari ko te kōhiwi anake tēnei. Kei whea te tātarakihi?”

I te raumati, ka rongo koe i ngā tātarakihi e waiata ana i runga i ngā rākau. Ko ngā mea tāne anake e hoihoi ana. I a rātou e waiata ana, ka rongo koe ki te piunga o ngā parirau.

Tipu ake te huhu o te tātarakihi ki rō oneone. Ka pakeke, ka mārō tōna kōhiwi. Ka wehe atu te oneone, ka piki atu ki runga i te rākau noho ai. Kāore i roa ka wāwāhi te kōhiwi, ka puta mai te tātarakihi ki waho. Ka waiho te kōhiwi tawhito nei e piri ana i runga i te rākau.

Koia tēnei ko te kōhiwi tawhito o te tātarakihi. “Āe. Kia ora Pāpā. Haere mai Kēmara. Me piki anō tāua ki runga i tō tāua rākau ki te rapa haere i ētahi atu ngangara.”